



UKA 2015/154  
13.OKT. 2015  
Kalistat Lund

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa suleqatigiissitamik susassaqartunik attuumassutilinnik inuttalimmik pilersitseqqullugit, taassumalu suliassarissagaa nunat pineqartut pingasut killeqanngitsumik niueqatigiinnissamik isumaqatigiissuteqassappata nunanilu avannarlerni killerni niuernermit siunnersuisoqatigiinnik pilersitsisoqassappat ataatsimut pissarsiarineqarsinnaasut nalunaarsornissaat.**

**Suleqatigiissitamut suliassarititat minnerpaamik ukuningga ilaqassaput:**

- **Nunani avannarlerni killerni killeqanngitsumik niueqateqarsinnaanermut isumaqatigiissuteqarnerup, imaluunniit nunat marluk akornanni, soorlu nunatta Islandillu aamma nunatta Savalimmillu akornanni, isumaqatigiissuteqarnerit iluaqutigisinnaasai ajoqutigisinnaasaalu nalunaarsussallugit.**
- **Killeqanngitsumik niueqateqarsinnaanermikkut nunat sutigut iluaqutissarsisinnaanersut sutigullu ajoqutissarsisinnaanersut nalunaarsussallugu.**
- **Nioqqutissat, sullissinerit, aningaasat innuttaasullu killeqanngitsumik nikerarsinnaatillugit ataatsimut aningaasaqarniarnikkut suleqatigiiffiortoqarpat tamatuma iluaqutigisinnaasai ajoqutigisinnaasaalu nalunaarsussallugit.**
- **Nunat pingasut akornanni killeqanngitsumik ammasumillu niueqatigiissinnaanermi periarfissat aporfissallu suussusersiniarlugit nunat avannarliit killiit niuernikkut siunnersuisoqatigiiffiannik pilersitsinikkut iluaqutissat ajoqutaasinnaasullu nalunaarsussallugit.**

(Aallartitat siulittaasuat Lars-Emil Johansen)

Ukioq manna februari aallartilaartoq Aasianni Nunat Avannarliit Killiit Siunnersuisoqatigiiffiata aaqqissugaannik, aalajangersimasumik sammisaqartitsilluni isumasioqatigiisitsisoqarpoq. Tamatumani sammineqarpoq Nunatta, Islandip Savalimmiullu akunnerminni niuernikkut niueqatigiinnikkullu suleqatigiinnerulersinnaanerat piviusorsiornerseq orniginartinneqarnerorlu.

Nunarput avaqqullugu Savalimmiut Islandilu akunnerminni killilersugaanngitsumik niueqatigiissinnaanerminnik 2006-mili isumaqatigiissuteqareerput Høyvik-mi isumaqatigiissummik taasaminnik. Tamatuma saniatigut Islandi "killilersugaanngitsumik niueqatigiiffimmut" EFTA-mut 1970-ili ilaasortaalersimavoq, 1994-iilli aningaasarsiornerup tungaatigut suleqatigiiffimmut ØES-mut ilaasortanngorsimalluni.

Høyvik-imi isumaqatigiissummumut nunatta ilanngussinnaanera eqqaallatsiarneqartaraluartoq suleqatigiiffik taanna savalimmiunut Islandimullu nalimmassagaalluni ilusilersugaammat nunatsinniit pullavigiinnarneqarsinnaanera isumaqatigineqartarsimangilaq.

Islandip Europa-mi ilaasortaaffeqarnera EU-mi aalajangersakkanut malitassaqaartitsisoq patsisaalluni, Nunatsinniit Savalimmiuniillu inuussutissat nunameersut immameersullu annikkaluartunilluunniit Islandimut eqqussisinnaaneq inerteqqutigineqarluinnarmat,

killilersugaanngitsumik niueriaaseq qanoq periarfissaqartitsisoq, nunat pingasut akornatsinni pilersinneqarsinnaanersoq misissorneqarnissaa soqutiginarpoq. Nunat Avannarliit Killiit Siunnersuisoqatigiiffiat ukiut 30-t matuma siorna pilersinneqarsimasoq siunertaqarpoq nunat pingasut akunnerminni suleqatigiinnerisa annertusarneqarnissaannik. Suleqatigiinneq ammaffigeqatigiinnermik tamatumunngalu kajungerinninnermik piumasaqarfiuvoq. Nunat pingasut akornatsinni suleqatigiinnerussagutta matut matoqqasut sulii amerlavallaarput taakkulu ammarneqartariaqarput.

Inuit Ataqaqatigiinni isumaqataavugut suleqatigiissitamik pilersitsisoqassasoq, killilersugaanngitsumik niueqatigiinnerup pilersinneqarsinnaaneranik periarfissaqarneranillu nalunaarusiortussanik.